

錦繡萬花谷

七







舊刊錦繡萬花谷

九冊



錦繡萬花谷卷第五

地

碁局

天圓如倚蓋地方如碁局天周於外地如卵黃焉

雞子中黃

天如雞子地如雞子中黃居於天內天大而地小

表裏有水四海之表浮於元氣之上天地各乘元

氣載水而行

晉志

坐大舡

地常動右轉譬人在大舟中閉牖而坐舟行而人

不覺

河圖括地

地軸

春秋括地象云地有三千六百軸

禹步四極

諸子稱地東西九十萬里南北八十五萬里日月

所照三十五萬里地乃過日月之表近為虛誕山

海經稱禹使大章步東極至西垂二億三萬三千

三百里又使豎亥步南極至北垂二億三萬三千

五百里

後天文志注

二億三萬餘里

八極之廣東西南北相去各二億三萬餘里自地

至天半八極之數

晉書地理志





天台山四萬八千丈

李太白天姥吟云天姥連天向天橫勢拔五岳掩赤城天台四萬八千丈對此欲倒東南傾

白集

黃山四千仞

送人歸黃山白鵝峯云黃山四千仞三十二連峯丹崖夾石柱齒齒金芙蓉

同上

九華山

青陽縣南有九子山高數千丈有九峯如蓮花按圖徵名無所依據予乃削其舊號加以九華之目傳之將來

李白集

天目山三萬六千丈

天目山在湖州安吉縣其高三萬六千尺勢連錢

塘

樂史環宇記

羅浮耀真天

羅山浮山合體故稱羅浮在魯城博羅二縣之境高三千丈有七十石室七十長溪名耀真天記云山高三千六百丈周回二百七十七里羅山也浮山乃蓬萊之別島堯時洪水浮至依羅山而止故曰羅浮

又見東風詩注

崆峒

崆峒山有三其一在臨洮一在安定一在汝州

寰宇記



山嶽 附石

岱宗

泰山一名岱宗王者受命易姓報功告代於其上  
岱者代也 白虎通義

衡山五峯

芙蓉紫蓋石廩天柱祝融

日觀

太山東南名曰日觀雞一鳴時見日出秦觀者望  
見長安吳觀者望見會稽周觀者望嵩山見黃河  
如帶 泰山記

天門

登泰山凡五十餘盤東上七十里經小天門大天  
門仰視天門如穴中視天牕 同上

祝融

衡山有祝融峯最高詩云一千里地盡皆見七十  
二峯中最高 青瑣

崑崙山萬一千里

水經云崑崙崑崙山去嵩高五萬里其高一萬一千里  
又仙傳拾遺云西王母所居崑崙之圃閭風之苑  
有城三千里玉樓十二左帶瑤池右環翠水 又  
十洲記崑崙崑崙山有三角一角正北名閭風巔一角  
正西名玄圃臺一角正東名崑崙崑崙宮王母居焉



五丁

蜀王本紀云天為蜀王生五丁力士能徙山秦王  
獻美女於蜀王蜀王遣五丁迎女見一大蛇出穴  
中五丁共引蛇山崩秦王女皆化為石

秦皇鞭石

秦始皇作石橋欲過海觀日出有神人能駭石下  
海石去不速神輒鞭之石皆流血又云始皇以術  
召石石自行至今皆東首 三齊畧記

望吳閭門白馬

孔子與顏回俱上泰山孔子望吳閭門外有繫白  
馬引顏淵以指之若見吳閭門乎顏淵曰見之有  
若繫練之狀孔子撫其目而止之因與俱下顏淵  
髮白齒落遂以病死 論衡

雲根

唐人多使雲根為石以雲觸石而生白樂天天竺  
石詩云下擔拂雲根東坡亦有詩云東麓雲根露  
芽角 詩注

山骨

退之聯句巧匠琢山骨剗中事煎烹謂石鼎也

溪中骨

山谷詩車載溪中骨推排若差宥

湖嶽



韓文瀟碧遠輸委湖嵌費携繁瀟碧謂竹也湖嵌謂石嵌口街切

### 江珎碎月

坡公寄石斛怪石詩云山骨裁方斛江珎拾淺灘清池上几案碎月落盃盤江珎碎月言怪石也詩注

### 歸墟

渤海之東不知幾億萬里有大壑焉實爲無底之谷名曰歸墟八紘九野之水莫不注之列子

### 沃焦

沃焦在碧海之東有石濶四萬里厚四萬里居百川之下尾故又名曰尾閭山海經堯時十日並出堯使羿射九日落爲沃焦又出莊子疏

### 海賦添鹽事

南史王融作海賦文辭詭激以示顧愷之愷之曰此賦實超玄虛但恨不道鹽耳即注曰灑沙構白熬波出素積雪中春飛霜暑路本傳

### 海不揚波賦

阮昌齡一筆成文其警句云收碣石之宿霧歛蒼梧之夕雲八月靈槎泛寒光而靜去三山神闥湛清影以遙連名賢詩話

### 碧海



東方朔十洲記東有碧海廣狹與東海等水不鹹  
苦正作碧色扶桑山在碧海中

青海

杜詩青海無傳箭天山早掛弓

海市

登州海中時有雲氣如宮室臺觀人物車馬歷歷  
可見謂之海市歐公使河朔過高唐縣夜有鬼神  
自空中過人馬之聲可辨父老云二十年前晝過  
亦彷彿見人物謂之海市 筆談

海外雜國

南州皆岸大海多洲島飄風一日蹕數千里漫不  
見蹤跡其海外雜國若耽浮羅流求毛人夷亶之  
洲林邑扶南真臘于陀利之屬東南際天地以萬  
數或時候風潮朝貢蠻胡賈人船交海中若嶺南  
帥得其人則外國之貨日至 韓文送鄭序

潮

日激水而潮生

日傳于天天右旋入海而日隨之水因其灼激而  
退退于彼必盈于此則潮之往來不足恠也日激  
水而潮生月離水而潮大地浮於水天在水外日  
入則晚潮激於左日出則早潮激於右 文粹  
天河海三水相合



繁氏云天河從北極分爲兩條至於南極其一經南斗中過其一經東斗中過兩河隨天轉入地下過而下水相得又與海水合三水相蕩而天轉之故激湧而成潮水

抱朴子

### 錢鏐以弓弩射潮頭

吳越王錢鏐嘗以弓弩射潮頭與海神戰自爾水不近城東坡詩云江神河伯兩醜雞海若東光氣吐霓安得夫差水犀手三千強弩射頭低

### 子胥乘素車爲潮神

吳子胥死戒其子投於江中吾當朝暮乘潮以觀吳之敗自是海門山潮頭高洶湧數百尺越錢塘漁浦方漸低小潮暮再來其聲震怒雷奔電激聞百餘里時有見子胥乘車白馬在潮頭之中因立廟以祠之

### 夏潮大冬潮小

潮者據朝來也言夕至也一月之中天再東再西故潮水再大再小又夏時日居南宿陰消陽盛而天高一萬五千里故夏潮大也冬時日居北宿陰盛陽消而天卑一萬五千里故冬潮小也春日居東宿天高一萬五千里故春潮漸起也秋日居西宿天卑一萬五千里故秋潮漸減也

抱朴子

### 沓潮



早潮下晚潮上兩水相合謂之沓潮

沓禹記

### 陵山觸岸

又曰濤水者潮取物多者其力盛來遠者其勢大  
今潮水從東地廣道遠陵山觸岸從直赴曲其勢  
不吐故涌起成濤同上

詩

八月十八潮壯觀天下無鯤鵬水擊三千里組練  
長駟十萬夫 海上濤頭一線來樓前指顧雪  
成堆從今潮上君須認更看銀山二十回

### 川瀆

水神無支祈

唐永泰中李湯任楚州有漁人釣龜山下入水見  
大鐵鎖盤繞山足湯命漁人加五十牛曳之見一  
獸狀如青猿觀者奔走後公泛洞庭得古嶽瀆經  
云禹理淮水驚風迅雷禹怒獲淮渦水神名無支  
祈受之庚神庚神鎖之置龜山之下 見異聞集

### 紫山黃河源

河之上流由洪濟梁西南二千里水益狹春可涉  
秋夏乃勝舟其南三百里三山中高而四下曰紫  
山古所謂崑崙者也東距長安五千里河源其間  
流澄緩下稍合衆流色赤見行益遠他水并注則  
濁河源南北莫直一磧尾蓋劔南之西唐劉元鼎



所見如此 吐蕃傳

淮水絕王氏滅

王導初仕郭璞筮之曰淮水絕王氏滅 晉本傳

潁水濁灌氏族

灌氏汝陰人陂池田園行潁水潁水兒歌曰潁水清灌氏寧潁水濁灌氏族

護風寒數處

吳紀步陟聘魏文帝問吳之戍備幾何曰自西陵至江都五千七百里疆界雖遠必爭之地不過數四猶人有六尺之軀其護風寒亦數處爾

笑布囊塞江

孫權嘗曰呂岱步陟說北人欲以布囊盛土塞江

每讀此表令人連日失笑 初學記云吳紀

湖

五湖即太湖三萬六千頃

禹貢謂之震澤周官謂之具區史謂之五湖以周回五百里故謂五湖又名笠澤又名太湖發湖州長興縣界入常州晉陵界又入無錫界晉陵之東入蘇州吳縣界廣三萬六千頃下有地道潛通上陵龍威丈人之所居也又或稱洞庭 十道記

洞庭青草

洞庭湖西岸有沙洲堆阜隆起即青草廟下一湖



之內中有此洲南名青草北名洞庭所謂重湖也  
張舜南迂錄

### 宮亭湖分風

東漢時廬山有神與人語言飲酒投盃能令宮亭  
湖中分風舡行奉航相逢樂巴為豫章太守未到  
十數日廟間神不復作聲巴本傳

臨安

### 龍飛鳳舞

郭璞有讖云天目山前兩乳長龍飛鳳舞到錢塘  
海門兩點蛾眉在五百年生異姓王自東晉迄五  
代錢鏐適當其年

### 鷲峰蟾窟

月缺霜濃細藥乾此花元屬桂堂仙鷲峰子落驚  
前夜蟾窟枝空記昔年東坡以桂花分贈楊綸注  
桂堂仙姮娥天竺山昔有梵僧云此山自天竺鷲  
峯飛來八月十五日夜嘗有桂子落蟾窟指楊綸  
及第也坡詩

### 金堂玉室

許邁遺王羲之書云自山陰南至臨安多有金堂  
玉室左元放之徒在焉坡注

### 錦谿石鏡

錢鏐宴故宅山林皆蒙以錦故有錦溪又有石鏡



鏐照之鏡起而聳臨安

### 衣錦城

唐昭宗升錢鏐營爲衣錦城石鑑山曰衣錦山鏐宴故宅山林皆覆以錦又號其幼所嘗戲大木曰衣錦將軍五代史

### 又石鏡

臨安淨土寺前有石鏡錢鏐布衣時嘗照鏡鏡起而聳

### 陌上花

吳越王妃每歲春必歸臨安王謂妃曰陌上花開可緩歸吳人用其語爲歌其詞東坡爲易之其一

曰陌花開時蝴蝶飛江山猶是昔人非遺民幾度垂垂老遊女長歌緩緩歸坡詩注

### 還鄉歌

錢鏐爲鎮東軍節度使封吳越王唐昭宗詔以所居爲衣錦城大官山曰功臣山鏐宴故老作還鄉歌曰三郎還鄉兮衣錦衣父老遠來相追隨斗牛無索人無欺吳越一王駟馬歸坡功臣等詩註

### 天竺寺

白樂天天竺寺詩云一山門作兩山門兩寺元從一寺分西澗水流東澗水南山雲起北山雲前臺花發後臺見上界鍾清下界聞遙想吾師行道處



仙花桂子落紛紛本集

### 靈隱寺

宋之問遊靈隱寺夜吟曰鷲嶺鬱岧峣龍宮隱寂寥  
夕不能續有老僧坐禪曰何不道樓觀滄海日  
門對浙江潮桂子月中落天香門外飄捫蘿登塔  
遠剝木取泉遙霜薄花更發冰輕葉互凋待入天  
台路看余渡石橋遲明僧不見人以爲駱賓王也  
古今詩話

### 夢謝亭

白樂天詩夢兒亭古傳名謝歌妓樓新道姓蘇注  
州西靈隱寺山上有夢謝亭即杜明浦夢謝靈運  
之所因名夢兒山本五  
百集

### 射潮

事見潮門

### 却月廊

夢遠吳山却月廊拂梅盧橘覺猶香注杭州梵天  
寺有月廊數百間多揚梅盧橘坡詩  
三百六十寺

西湖天下景遊者無愚賢淺深隨所得誰能識其  
全三百六十寺幽尋遂窮年所至得其好心知口  
難傳坡詩

### 積葑築堤



杭州西湖南北三十里環湖往來終日不達東坡  
治葑田積之湖中為長堤以通南北又云已打量  
葑田二十五萬餘丈見墓誌

蘇公堤

杭州本江海之地水泉鹹苦唐刺史李泌始引西  
湖水作六井民足於水及白居易復浚西湖淤水  
入運河自河入田所溉至千頃然湖水多葑久廢  
開治至是積二十五萬餘丈而水無幾矣運河失  
湖水之利取給於江湖潮濁多淤河行闌閘中三  
年一淘為市井大患而六井亦幾廢子瞻至浚二  
河以茅山一河受江湖以鹽橋一河受湖水復造  
堰閘以為湖水蓄洩之限然後潮不入市且復修  
六井又取葑田積湖水為長堤以通南北杭人名  
其堤曰蘇公堤墓誌

詩

望海樓明照曉霞護江堤白耀晴沙濤聲夜入伍  
負廟柳色春藏蘇小家紅袖織綾誇柿蒂青旗沽  
酒聽梨花注城東樓名望海俗號酒名梨花春白  
樂天餘杭形勝四方無州旁青山縣枕湖遶郭荷  
花三十里拂城松樹一千株夢兒亭古傳名謝歌  
妓樓新道姓蘇同上錢塘江北百餘里漲沙不復  
生菰蒲沙田老桑出葉麓江湖打根根半枯八月



九月秋風惡風高駕潮晚不落鼓聲襲襲艦伊喔  
爭湊富春城下泊晁无咎樓觀滄海日門對浙江

潮桂子月中落天香雲外飄賈王燈火萬家城

四畔星河一道水中央樂天門前碧浪家家海樓

上青山寺寺雲陳堯佐鎮長錦繡花邊日堆疊琉

璃水面風范克夫水光瀲灩晴方好山色空濛雨

亦奇欲把西湖比西子淡粧濃抹恣相宜東坡日

暖梨花催美酒天寒桂子落空山歐公

蘇州吳郡

### 虎丘

吳王闔閭葬國西銅棺三重水銀為池金玉為鳧

鴈扁諸之劍三千方圓之劍三千槃郢魚腸之劍

在焉葬後三日金精之氣上揚化為虎据其墳故

號虎丘吳越春秋

### 蛇門

闔閭內傳云立閭門者以象天門通閭闔風立蛇

門者以象地戶吳越春秋

### 姑蘇臺

越絕書曰闔廬起姑蘇臺三年聚材五年乃成高

見三百里

### 閭闔城

吳王闔閭使伍子胥相土嘗水象天法地築為大



城四十里小城十里開八門以象八風吳郡圖經

觀風樓飛雲閣

白樂天於西樓命宴齊雲樓晚望皆有詩西樓今之觀風樓也齊雲今之飛雲閣也圖經

潤州

鶴林寺杜鵑花

事見重陽門

狼石

潤州甘露寺有石如羊名狼石相傳諸葛孔明與孫權坐此以謀曹公坡注

萬歲樓

潤州城南有樓名萬歲俗傳樓上煙出刺史即死不死即罷開元後董琬採訪居此州盡日煙出刺史憂愁至死乾元中又煙出有吏密伺之就視乃蚊子樓中有井小蟲黑色而小作圍而上遙見類煙從此無慮廣記

四雄

甘露寺有狼石諸葛孫仲謀坐此論曹公又有二鐵鑊梁武帝所鑄李德裕祠堂坡詩云四雄皆龍虎遺迹儼未刊

浮玉山

坡詩注即金山也



北顧樓

潤州城西有嶺入江高數十丈三面水照號曰北嶺蔡君謨起樓其上武帝升之乃曰此嶺不足須固守京口實乃壯觀遂改曰北顧故詩云北顧樓前一笛風碧雲飛入建康宮

戴公山

戴顓世居剡下又徙居京口止黃鶴山宋文帝欲見之嘗謂黃門曰吾東巡之日當宴戴公山下南史

詩

兩州城郭青煙起千里江山白鷺飛 三峽江聲流筆下六朝山影滿樽前揚端雄風搖碧綠畫角

吊黃昏一帶分江汜雙峯點海門韓持國雲捧樓

臺聳天上風飄鐘磬落人間銀河倒瀉分雙月錦水西來轉幾山揚端金山杳在滄溟中雲崖水柱

浮仙宮乾坤扶持自今古日月彷彿躔西東寒蟾八月蕩瑤海秋光上下磨青銅鳥飛不盡暮天碧

漁歌忽斷蘆花風郭正祥萬古波心寺金山名日

新天多剩得月地少不生塵過櫓妨僧夢驚濤濺佛身誰云張處士題後更無人孫勳海山亂點當

軒出江水中分遶檻流天遠樓臺橫北顧夜深燈

火見揚州揚端樓臺影落魚龍駭鍾磬聲來水石

寒日暮海門飛白鳥潮回瓜步見黃灘王令天末



海門橫北固煙中沙岸似西興王介甫僧依玉鑑

光中住人在金鰲背上行蘇紳水光浮柱礎天影

帶樓臺觸石雲孤起吹潮雨四來石曼卿山分江

色破潮帶海聲來范仲淹淮船分蟻點江市聚蠅

聲徐融濤頭風雪裏山脚石蟠虬女仙

### 秀州

#### 攜李

吳王闔閭伐越越王迎擊之攜李越使死士挑戰  
三行造吳師自到吳師觀之越因伐吳敗之姑蘇  
攜音醉在嘉興縣有攜李城今秀州也史記

### 湖州

#### 天目山

事見山嶽門

#### 太湖

五湖即太湖禹貢謂之震澤周官謂之具區史謂  
之五湖十道記

#### 苕溪霅溪

苕水出浮玉山又云霅水苕水之別名大率一水  
二名皆在湖州寰宇記又坡詩注苕溪四水之一  
名四水合為一溪曰苕溪曰前溪曰餘溪曰霅溪

#### 白蘋洲

梁柳惲為吳興太守賦詩曰汀洲採白蘋日晚江



南春因此得名

坡詩注

弁峯

霽水未渾纓可濯弁峯初見眼應明  
名坡詩

松江

一名笠澤出太湖東北入海

吳郡耆舊經

崑山

在本縣西北又在華亭晉陸機與弟雲生於華亭  
以文為世所貴時人比之崑崗出玉故此山得名

水晶宮

吳興集刺史楊漢公傑九月十五日夜絕句云江

南地暖少嚴風九月炎涼正得中溪上玉樓樓上

月清光合作水晶宮吳興因此謂之水晶宮

名漢詩話

雪宮

坡詩不見飛蚊如立豹請垂白馬過垂虹吟哦相

對忘三伏擬泛冰溪入雪宮

注謂湖州也

金沙泉造茶

湖州長城縣啄木嶺金沙泉每歲造茶之所居常

無水湖常二郡守至境具牲祭泉其夕清溢造御

茶畢其水即微減太守造畢即涸

張君房睽說

駱駝橋

唐垂拱中作駱駝橋以形似駝背名之  
東坡詩注



垂虹橋

吳江有橋慶曆八年縣尉王庭堅所建東南千餘尺縈以修欄甃以淨甃前臨具區橫截松陵湖光海氣蕩漾一色橋有亭名曰垂虹云蘇子美有詩是也

圖經

洞庭

吳郡圖經水經云有洞室入地潛行北通琅玕東武俗謂之洞庭

杜牧尋春遲

杜牧聞湖州奇麗往遊之因見一女子期之曰吾不十年來守此郡不來從所適泊牧守湖女已從人三年矣牧因賦詩曰自是尋春去較遲不須惆悵怨芳時東風落盡深紅色綠葉成陰子滿枝

詩

餘杭自是水仙窟似聞吳興更清絕湖中橋林新著霜溪上苔花正浮雪顧渚茶芽白於齒梅溪木瓜紅勝頰吳兒膾縷蕩欲飛未去先說饒涎垂亦知謝公到郡久應怪杜牧尋春遲

東坡

茗溪清淺

雪溪斜碧玉寒光照萬家誰向月中終夜聽洞庭

漁笛隔蘆花 陳堯佐題碧瀾堂

雪溪景物見歌詩

只有當年杜紫薇沽酒店穿斜巷出採蓮舸傍後門歸翠沾城郭山千點清蘓樓臺水一圍

俞秀老



烏程釀美吳娘舞剩醉江南橋袖天 曾子開

常州

罨畫溪

古云常州陽羨三湖九溪地志云今只有六溪其三溪不知其處六溪之中有荆溪首受蕪湖東至陽羨入海浙俗呼為罨畫溪 坡詩

惠山泉

劉伯芻論水以揚子江為第一惠山石泉為第二而李秀卿論水廬山康王谷水第一無錫惠山泉第二凡三十六種 六乙集

漪瀾堂

常州無錫縣惠山寺有漪瀾堂

越州

禹以會稽名郡

越州會稽郡禹揚州之域春秋屬越國春秋元命苞牽牛流為揚州分為越國吳志會稽連南山萬里北帶浙江吳越春秋禹巡行天下歸還大越會稽修國之道以會稽名郡云又曰剡縣屬會稽南史張櫻為剡令至嵯亭生子因名嵯子四山會稽志龜山之下有東武里即琅邪東武縣山一夕移於此東武人皆從此故里不動 十道志

沃州山天姥岑



東南山水越為首剡為面沃州天姥為眉目沃州  
山有剡縣南三十里天姥岑之陰南對天台北對  
四明謝靈運詩云暝投剡中宿明登天姥岑朱放  
詩月在沃州山上人在剡溪江邊白居易院記文  
粹

### 鏡湖

會稽山陰編戶三萬號為天下繁劇王羲之每行  
山上如燕中遊戲之曰望鏡湖清流注瀉乃天下  
山川之美使人應接不暇十道記

### 禹穴

司馬遷南遊江淮上會稽探禹穴張宴曰禹巡守

至會稽而崩因塋焉上有孔穴或云禹入此穴中

### 苧羅山

越州諸暨縣苧羅山有東施家西施家西子姓施  
而在西者越王以獻吳王其後竟以滅吳小贊

### 若耶溪南北風

射的山南白鶴山北鶴為仙人取箭鄭弘採薪得  
一箭有人取而取之鄭弘還之問何所欲弘識其  
神人也曰常患若耶溪載薪為難願旦南風暮北  
風後果然故若耶溪風至今為然呼為鄭公風弘

本傳

### 蓬萊閣



越州號蓬萊元徽之守越以州宅誇白樂天云我  
是玉皇香案吏謫居猶得在蓬萊今越州有蓬萊  
閣因元立名及以名酒也 坡詩注

### 雲門寺

若耶溪雲門寺在越州會稽縣南 杜詩

### 雷門

王尊曰毋持布鼓過雷門注雷門謂會稽有大鼓  
擊之聲聞洛陽 漢書

### 千巖萬壑

人問顧凱之越州山水曰千巖競秀萬壑爭流

### 明州

奉化郡

### 四明山

四明山二百八十峯洞周回一百八十里山有四  
門通日月星辰光故名四明

### 鶯脰

孫仲益尺牘云四明二湖之勝而新築領其要領  
見曾南豐集記廣德湖俗所謂鶯脰者今墾而為  
田矣 南豐集

### 天台

天台臨海郡

### 應台星故名天台

天台赤城山高一萬八千丈周回五百里上應台  
星故曰天台 洞天福地記



赤城山

赤城山色赤狀似雲霞故天台賦云赤城霞起以建標謂此也會稽記

玉霄峯

天台山有玉霄峯唐司馬子微所居之處

金庭宮

按仙經桐栢山金庭宮一名天台山周靈王太子得道爲桐栢真人治金庭宮云

國清寺豐干

豐干禪師居國清寺嘗乘虎入松門衆驚後於天台示滅傳燈錄

寒山拾得

寒山者始豐縣有寒明二岩以居寒岩中得名時往國清寺就拾得取僧殘食食之拾得者因豐干行山中見一兒可數歲孤弃豐干携至國清寺名拾得在厨内滌器嘗日齋畢澄溢食滓寒山來即負之而去問立公出牧豐干造之問立乞一言豐干曰到任記謁文殊普賢曰二菩薩安在師曰國清寺洗器者寒山拾得是也問立尋至寺問寒山拾得是何人有僧對曰二人現在厨執役問立訪之不覺致拜二人連聲叱咄曰豐干饒舌二人自此相携出松門問立又至寒岩禮謁二人高聲唱



之便縮入岩石縫中忽然縫合同上

### 婺州

天文婺女名郡

東陽郡禹貢揚州之域春秋為越之西界秦屬會稽漢初置荆吳二國郡國志婺州正得東越之地漢時其地屬會稽為東陽州吳寶鼎元年始分會稽置東陽郡隋平陳為婺州蓋取地為天文婺女之分野異苑志東陽顏烏以純孝著名群烏助銜土成墳烏口皆傷一境以為至孝所致因以縣名烏傷十道志

### 温州

郡國志又為東甌

十道志永嘉郡會稽之東境也漢永建四年置永嘉縣郡國志永嘉為東甌鬱林為西越斯地蠶一年八熟

### 鴈蕩山

自古圖史不載鴈蕩山按西域書云按諾矩羅居震旦東南大海際鴈蕩山唐貫休詩云鴈蕩經行雲漠漠龍湫宴坐雨濛濛其上有經行臺宴坐峯後人以休詩名之古今詩話

### 衢州

三衢山名州



十道志衢州信安郡土地所屬與婺州同唐武德四年李子通於信安縣始置州西有三衢山因以爲名輿地志後漢獻帝初平三年分太末縣立新安縣晉康元年以弘農有新安改名信安左傳越伐吳王孫彌庸觀越見姑蔑之旗杜預注今云東陽大蔑縣是此地也秦漢爲太末縣今龍丘乃春秋東陽太末也

處州

圖經古縉雲之墟

圖經縉雲郡古縉雲之墟也秦爲會稽郡漢初爲東甌地後以爲台州回浦縣光武更名章安晉分爲永嘉郡輿地志永嘉郡本會稽東部地晉明帝大寧元年分臨海等五縣立永嘉郡圖經麗水縣有惡道中有突星漱靈與弟書曰聞惡道溪中九十九里有五十九灘永嘉記曰右軍遊惡道嘆其竒絕遂至突星漱靈吳地記松陽縣在南臨大溪有松樹大八十一圍中空可容三十人坐取此以爲名永嘉記曰青田縣有草葉似竹可染碧名爲竹青此地所豐故名青田浮丘公相鶴經曰青田之鶴

建康

建康金陵秣陵皆建康也

王氣



本名金陵秦時望氣者曰東南有天子氣五百年  
有王者興始皇遂東遊以厭之改金陵為秣陵孫  
權又改為建鄴至晉元帝適當其時

龍蟠虎踞

諸葛孔明謂吳帝曰鍾山龍蟠石頭虎踞真帝王  
都也

寰宇記

猿驚鶴怨

揚蟠詩猿驚鶴怨不知處虎踞龍蟠空見山猿驚  
鶴怨蔣山二谷之名

翰苑名談

石頭城

建安十六年改秣陵曰建鄴孫權改後十七年權  
又改石頭城

地肺

陶隱居真誥云金陵者勾曲之地肺也水至則浮  
故曰地肺也

三茅君三秀山

茅濛字初成先是有謠曰神仙得者濛初成繼世  
而往在我盈濛之孫盈字叔申漢地節中得道於  
金陵勾曲山受金匱九錫之命為司命真君邦人  
改勾曲為茅君山

洞仙傳

又掇遺又神仙傳大茅

君名盈次名固次名秉老君拜盈為司命真君固  
為定錄真君秉為保生真君故號三茅君 又真



誥注有大茅山中茅山小茅山山之峯各秀故曰三秀

三閣

陳後主寵張麗華起迎春結綺望仙三閣並複道往來

西州門

江寧府有東府城城中有揚州驛在府西故時人謂之東府西州而東府之西門謂之西州門又云會稽王道子第在東府城之東謝安薨以道子代領揚州揚州在第西故時人號為東府西州

白下長干

白下縣故城在上元縣城西本江乘縣白石壘吳都賦長干延屬李善注云江東謂山岡間為干建鄴之南有山間平地故曰干今城南有長干寺城東門有白下亭是也

芙蓉堂

王荆公罷相知金陵作詩曰投老歸來一幅巾君息猶許備藩臣芙蓉堂下疏秋水聊與龜魚作主人

東軒筆錄

詩

劉禹錫金陵五詠 石頭云山圍故國周遭在潮打空城寂寞回淮水東邊舊時月夜深還過女墻



來 烏衣巷朱雀橋邊野草花烏衣巷口夕陽斜  
舊時王謝堂前燕飛入尋常百姓家 臺城臺城  
六代競豪華結綺迎春事最奢萬戶千家成野草  
只緣一曲後庭花 又江令宅王公講堂詩見本  
集王濬樓舡下益州金陵王氣黯然收千尋鑄鎖  
沉江底一片降幡出石頭荒苑至今生茂草  
依舊枕寒流如今四海歸皇化兩岸蕭蕭蘆葦秋  
同上 玉樹歌沉王氣終景陽兵合曙樓空梧楸遠  
近千家塚黍稷高低六代宮石燕拂雲晴亦雨江  
豚翻浪夜還風英雄一去豪華盡唯有江山似洛  
中 薛詩昌

宣州

宛水昭亭

宛水昭亭山谷詩試說宣州郡傳盃且細聽晚樓  
明宛水春駙簇昭亭粳粳豐圩戶榆楊卧訟庭謝  
公歌舞地時對換鵝經注宣州即漢之宛陵縣有  
宛溪水 詩話

打鴨驚鴛鴦

呂士隆知宣州好答官妓適杭州一妓到士隆喜  
之一日郡妓復小過士隆欲答之妓曰某不敢辭  
但杭妓不安士隆捨之梅聖俞作莫打鴨詩曰莫  
打鴨打鴨驚鴛鴦鴛鴦新向池西落不比孤洲老



鵠鶴鵠一作禿魏泰詩話

### 徽州

因晉孔愉故名新安郡

歙州新安郡屬揚州春秋時屬越秦屬丹陽郡漢志黟縣屬丹陽郡浙江出焉師古曰黟音伊晉孔愉字敬宗會稽人永嘉之亂避地入新安山谷以稼穡讀書爲業信著鄉里後奄忽而去人皆以爲神爲立廟孔靈村梁書任昉爲新安守諷楓香二石始入三兩便止不欲遺之後人及下任昉唯有桃花米二十石圖經曰歙州婺源縣本晉休寧縣東陽記上應婺女星故名十道志

### 饒州

鄱陽郡

餘干白雲亭

唐劉長卿字文房爲隨州守嘗題餘干東齋亭云世事終無夢生涯爲半過白雲心已矣滄海意如何後人立白雲亭山谷題亭云曩誰築孤城勝日有感遇永懷知隨州因榜白雲句黃詩注

### 斷鱉洲

吳時長沙大飢殺人無數孫權使趙達占之曰天地川澤相通如人四躡鼻衄灸脚而愈今餘干水口嘗暴起一洲形如鱉食彼郡風氣可掘去權遣人斷其背飢遂止其水在饒州餘干縣洽聞錄



千越亭

饒州餘干縣有千越亭前瞰琵琶洲後枕思禪寺  
林麓森鬱千峯競秀張祐題云扁舟亭下駐煙波  
十五年遊從此過洲背露沙人渡淺風稍藏竹鳥  
啼多層攔漲水痕由在古板題詩字已訛况是高  
秋正圓月可堪聞聽異鄉歌 文公談苑

楚州 山陽

壽州 壽春

廬州 廬江

和州 歷陽

海州 海陵

濠州 渦口

隆興

隋平陳為洪州

豫章禹貢揚州春秋吳秦九江郡漢豫章豫章記

隋平陳為洪州 十道志

慨口

城東十三里縣列江邊名慨口豫章大江之口也  
昌邑王每乘流東望輒憤慨而還故謂之慨口 後  
地理志

豐城寶劍千牛斗

初吳之末滅牛斗之間常有紫氣術者以為吳方



強盛唯張華以爲不然及吳平紫氣愈明華聞豫章人雷煥妙達緯象乃要煥同登樓仰望煥曰斗牛之間頗有異氣華曰是何祥也曰寶劍之精上徹于天耳華問在何郡曰在豐城華即補煥爲豐城令掘獄屋基入地四丈餘得石函中有雙劍一曰龍泉二曰太阿其夕斗牛間不復見氣焉

華傳

### 陳蕃榻

後漢陳蕃任南昌罕所接見惟設一榻以待徐穉去則懸之故滕王閣記云人傑地靈徐孺下陳蕃之榻

### 贛州

### 隋平陳立虔州

南康郡春秋吳秦九江郡漢爲贛縣屬豫章後漢興平二年分豫章廬陵郡而贛縣屬焉晉大康二年立南康郡隋平陳立虔州以虔化水而得名又曰南康縣本漢南野縣吳錄南野縣有大庾山九嶺嶠通廣泉

十道志

### 八境

孔周翰守虔以八境圖寄東坡求詩坡爲賦八首  
鬱孤臺章貢臺白鶴樓皂蓋亭塵外亭

### 螺女廟

謝端鈞於江上獲巨螺置之於家每歸則飲食盈



按潛伺之有女子具饌於室執而問焉女曰我乃螺女水神天帝憫君之孤遣爲具食我亦當去乃留空螺曰君有所求取於螺出門不見後端食之採螺皆如意傳數世猶在故有螺女洲螺女廟在虔州東南坡詩注

### 袁州

隋平陳置州

宜春屬揚春秋吳秦屬九江郡漢爲豫章郡之宜春縣晉武改爲宜陽隋平陳分洪州宜陽立袁州吳錄宜春縣出美酒每歲上貢賦計吏十道志

### 吉州

以吉陽山名郡

吳越戰國楚秦併天下屬九江南部都尉漢爲廬陵縣屬豫章雷次宗豫章志獻帝初平二年始立郡圖經隋平陳改廬陵郡爲吉州以吉陽山爲郡名十道志

### 撫州

隋平陳置州

臨川郡禹貢揚州春秋吳地秦九江郡漢立南昌縣後漢分南昌立臨汝縣吳太平二年分豫章之臨汝南城縣立臨川郡即今州也隋平陳置撫州晉王羲之爲臨川內史宅於郡城東偏荀伯子臨



川記曰右軍故宅其地爽塏山川若畫每重陽日  
二千石多萃於斯舊宅及墨池猶存漢地理志高  
帝六年大將軍灌嬰立洪州其年分洪州南境之  
南城縣以其在郡城之南故曰南城

十道志

江州

### 宮亭湖

廬山南臨宮亭湖西南有雙闕壁立千餘仞有瀑  
布焉

後地理志

### 琵琶亭詩

夜泊潯陽宿酒樓琵琶亭畔荻花秋雲沉鳥沒事  
已往月白風清江自流

### 吏隱

白居易江州司馬廳記曰郡南樓山北樓水溢亭  
百花亭風篁石岩瀑布廬宮源潭洞東西二林寺  
泉石松雪司馬廳盡有之苟有志吏隱舍此何求  
焉

職官分紀

錦繡萬花谷卷之五









